

## **RADNI TEKST!**

# **ZAKON** **o preuzimanju finansiranja neizmirenih doprinosa** **za penzijsko i invalidsko osiguranje za osiguranike zaposlene u privrednim** **društvima sa većinskim državnim kapitalom u Federaciji Bosne i** **Hercegovine u periodu 01.04.1992. – 31.12.2014 godine.**

## **I. OPĆE ODREDBE**

### **Član 1.**

Ovim zakonom se uređuju uvjeti, način, izvor i sredstva za finansiranje neizmirenih doprinosa za penzijsko i invalidsko osiguranje za period od 01.04.1992. do 31.12.2014 godine za osiguranike zaposlene u privrednim društvima sa većinskim državnim kapitalom u Federaciji Bosne i Hercegovine (u daljem tekstu: „Federacija BiH“).

### **Član 2.**

Neizmireni doprinosi za penzijsko i invalidsko osiguranje, u smislu ovog Zakona su doprinosi koji se odnose na period osiguranja od 01.04.1992. do 31.12.2014 godine, a za koja do dana stupanja na snagu ovog zakona nisu izvršene uplate.

### **Član 3.**

Uplata neizmirenih doprinosa za penzijsko i invalidsko osiguranje u skladu s ovim Zakonom odnosi se na osiguranike u Federaciji BiH koji se vode u evidencijama o osiguranicima u Federalnom zavodu za penzijsko i invalidsko osiguranje (u daljem tekstu: „Federalni zavod“), kao prijavljeni na osiguranje u razdoblju od 01.04.1992. do 31.12.2014 godine, koji su u navedenom periodu bili zaposleni u privrednim društvima u čijem osnovnom kapitalu je državni kapital čiji je vlasnik Federacija BiH, kanton, grad ili općina, zastupljen sa više od 50%.

## **II. OSNOVICA STOPA I POSTUPAK IZMIRENJA DOPRINOSA** **ZA PENZIJSKO I INVALIDSKO OSIGURANJE**

### **Član 4.**

Osnovica za obračun doprinosa za penzijsko i invalidsko osiguranje po jednom mjesecu osiguranja za koji nije uplaćen doprinos je minimalna osnovica za uplatu doprinosa za penzijsko i invalidsko osiguranje važeća u mjesecu u kojem ovaj Zakon stupa na snagu.

Stopa doprinosa koja se primjenjuje je stopa doprinosa iz plaće i drugih primanja osiguranika i stopa doprinosa na isplaćene plaće na teret poslodavca, obje važeće u mjesecu u kojem ovaj Zakon stupa na snagu.

Obračun penzija za korisnike iz člana 3. ovog zakona vršit će se u skladu sa članom 48. Zakona o penzijskom i invalidskom osiguranju ("Službene novine Federacije BiH", br. 29/98, 49/00, 32/01, 73/05, 59/06,4/09 i 55/12)

#### **Član 5.**

Zahtjev za ostvarivanje prava po ovom zakonu podnosi poslodavac za zaposlene koji su bili u radnom odnosu u periodu i pod uslovima iz ovog zakona,

Zahtjev se podnosi Federalnom zavodu - prema sjedištu poslodavca

Uz zahtjev se podnosi:

- 1) spisak zaposlenih kojima nije uplaćen doprinos, koji sadrži i period za koji nije uplaćen doprinos, sa ugovorom o radu ili odlukom, odnosno rješenjem o zasnivanju radnog odnosa, te obavezno podatak o datumu sa kojim je zaposlenik ispunio uslove za penzionisanje, odnosno kada zaposlenik navršava uslove za penzionisanje bilo po osnovu propisanih godina života odnosno penzijskog staža;
- 2) pismenu saglasnost zaposlenog da prihvata uplatu doprinosa u skladu sa ovim zakonom;
- 3) dokaze da su zaposleni u tom periodu bili prijavljeni na osiguranje.
- 4) dokaze o ispunjavanju uslova iz člana 3. ovog zakona
5. dokaz da se na njih ne odnose odredbe člana 18. ovog zakona

Poslodavac je dužan da najkasnije 30 dana prije isteka roka za podnošenje zahteva utvrđenog ovim zakonom, u službenim prostorijama objavi spisak iz st. 2. ovog člana i omogućiti uvid zaposlenima i drugim zainteresovanim licima,

#### **Član 6.**

Zahtjev za ostvarivanje prava po ovom zakonu mogu podneti i osobe:

- 1) koje su bile u radnom odnosu kod poslodavca koji je prestao da postoji (stečaj, likvidacija i dr.);
- 2) koje su prešle na rad kod drugog privatnog poslodavca ili je došlo do promjene strukture vlasništva poslodavca (državni udio u kapitalu više nije većinski);
- 3) za koje poslodavac nije podneo zahtjev iz člana 5. ovog zakona.

Za umrlog osiguranika, zahtjev iz stava 1. ovog člana može podneti osoba koja ispunjava uslove za sticanje prava na porodičnu penziju.

Zahtjev iz st. 1. i 2. ovog člana podnosi se Federalnom zavodu, a uz isti se obavezno podnose dokazi iz člana 5 stav 2. ovog zakona.

#### **Član 7.**

Zahtjev iz čl. 5. i 6. ovog zakona može da se podnese u roku od tri mjeseca od dana stupanja na snagu ovog zakona.

#### **Član 8.**

Na osnovu zahtjeva iz čl. 5. i 6. ovog zakona i drugih podataka kojim raspolaže Federalni zavod će utvrditi: osiguranike koji imaju staž osiguranja za

koji nisu uplaćeni doprinosi za penzijsko i invalidsko osiguranje, poslodavce kod kojeg su, ili su bili u osiguranju, periode takvog staža osiguranja za svakog osiguranika pojedinačno, iznos potrebnih sredstava za uplatu doprinosa za penzijsko i invalidsko osiguranje za svakog osiguranika pojedinačno, kao i ukupan iznos potrebnih sredstava, te datum sa kojim je zaposlenik ispunio ili potencijalno navršava uslove za penzionisanje.

Federalni zavod u roku od 90 dana od isteka roka iz člana 7. ovog zakona izvještaj o svim podacima iz stava 1. ovog člana i isti, putem federalnog ministarstva rada i socijalne politike, dostavlja Vladi Federacije BiH koja će se odrediti o ovom izvještaju u roku od 30 dana od zaprimanja istog.

#### **Član 9.**

Usvojeni izvještaj iz stava 2. člana 8. ovog Zakona se objavljuje u „Službenim novinama Federacije Bosne i Hercegovine“ i na zvaničnoj internetskoj stranici Vlade Federacije Bosne i Hercegovine i Federalnog zavoda.

#### **Član 10.**

Osobe koje smatraju da mogu ostvariti pravo predviđeno ovim Zakonom, a nisu obuhvaćene usvojenim izvještajem iz stava 2. člana 8. ovog Zakona, imaju pravo u roku od 30 dana od dana objavljivanja izvještaja iz člana 9 ovog zakona u „Službenim novinama Federacije Bosne i Hercegovine“ podnijeti Federalnom zavodu zahtjev za uvrštavanje u isti, sa dokumentacijom kojom raspolažu i dokazuju svoje tvrdnje.

Federalni zavod odlučuje o zahtjevu iz stava 1. ovog člana u skladu sa odredbama zakona koji reguliše upravni postupak.

#### **Član 11.**

O usvojenim zahtjevima iz člana 10. ovog zakona i sudskim presudama, Federalni zavod sačinjava i podnosi izvještaj Vladi Federacije Bosne i Hercegovine na usvajanje svaka tri mjeseca, a Vlada Federacije Bosne i Hercegovine postupa u skladu sa odredbama stava 2. člana 8. i člana 9. ovog Zakona.

#### **Član 12.**

Federalni zavod je obavezan svaka 3 mjeseca sačinjavati spisak osoba koje ispunjavaju uslove za ostvarivanje prava na penziju prema odredbama Zakona o penzijskom i invalidskom osiguranju.

Spisak osoba iz stava 1. ovog člana, putem Federalnog ministarstva rada i socijalne politike, dostavlja se Vladi Federacije BiH, koja će posebnim odlukama odobravati uplatu doprinosa za penzijsko i invalidsko osiguranje za konkretne osobe.

Po izvršenoj uplati na osnovu odluke iz stava 2. ovog člana, Federalni zavod poduzima potrebe radnje radi evidentiranja staža osiguranja u bazi podataka osiguranika za godine za koje je izvršena uplata, i to kao staža osiguranja za koji su uplaćeni doprinosi za penzijsko i invalidsko osiguranje.

Postupak u vezi evidentiranja podataka o stažu osiguranja i doprinosa za penzijsko i invalidsko osiguranje, evidentiranja promjene zaduženja, novih zaduženja, brisanja kamata, evidentiranja uplata u Poreznoj upravi F BiH i druga provedbena pitanja uredit će se jedinstvenim pravilnikom Federalnog zavoda i Porezne uprave F BiH, na koji će saglasnost dati Federalno ministarstvo rada i socijalne politike i Federalno ministarstvo finansija.

O uplati sredstava, broju osoba koje su uvedene u pravo i vremenu za koje je utvrđen staž osiguranja Federalni zavod, jednom mjesečno obavještava Federalno ministarstvo rada i socijalne politike.

### **Član 13.**

Osobe iz člana 3. ovog zakona, kojima je utvrđeno pravo na uplatu doprinosa za penzijsko i invalidsko osiguranje, u skladu sa odlukom Vlade Federacije BiH iz člana 12. ovog zakona, prava iz penzijskog i invalidskog osiguranja mogu ostvariti tek nakon što potrebna sredstva budu uplaćena na žiro račun Federalnog zavoda.

## **III FINANSIRANJE**

### **Član 14.**

Federacija Bosne i Hercegovine će u skladu sa ovim zakonom i sredstvima predviđenim u Budžetu Federacije BiH osigurati Federalnom zavodu za penzijsko i invalidsko osiguranje potrebna sredstva za uplatu doprinosa za penzijsko i invalidsko osiguranje za osiguranike i razdoblja iz člana 3. Zakona.

Sredstva iz stava 1. ovog člana se mogu se osigurati iz sljedećih izvora:

1. Izdavanjem dužničkih vrijednosnih papira od strane Federacije BiH
2. Prodajom imovine iz pasivnog podbilansa Federacije BiH,
3. Prodajom kapitala u vlasništvu Federacije BiH,
4. Ostalih kreditnih i drugih posebnih izvora

### **Član 15.**

Nakon što Federacija BiH izvrši uplatu doprinosa za osiguranike iz člana 3 ovog zakona, Vlada Federacije BiH će putem nadležnih institucija pokrenuti aktivnosti za utvrđivanje eventualne odgovornosti uprave preduzeća iz razdoblja za koji nisu plaćeni doprinosi.

## **IV. PRIJELAZNE I ZAVRŠNE ODREDBE**

### **Član 16.**

Nadzor nad primjenom ovog Zakona vrše Federalno ministarstvo rada i socijalne politike i Federalno ministarstvo finansija, svako u okviru svoje nadležnosti.

U vršenju nadzora ministarstva iz stava 1. ovog člana mogu radi otklanjana eventualnih nejasnoća u provedbi ovog Zakona davati obvezujuće upute Federalnom zavodu i Poreznoj upravi F BiH.

#### **Član 17.**

Prava iz ovog Zakona mogu ostvariti samo osobe koje nisu ostvarile pravo na penziju do dana stupanja na snagu ovog Zakona.

Osiguranici kojima je u bazi matične evidencije registriran poseban staž iz člana 94. Zakona o penzijskom i invalidskom osiguranju, u razdoblju iz člana 3. ovog Zakona, ne ostvaruju prava po ovom Zakonu za isto razdoblje.

#### **Član 19.**

Izuzetno prava iz ovog Zakona mogu ostvariti osobe koje su u periodu od 30.04.1992 do 31.12.1992. godine, bile na radnoj obavezi ili u službi civilne zaštite opština Bosanski Brod, Derventa, Modriča, Odžak, Bosanski Šamac, Orašje i Brčko.

Detaljnije uslove, postupak za ostvarivanje prava iz stave 1. ovog člana propisat će pravilnikom Federalno ministarstvo za pitanje boraca u invalida odbrambeno-oslobodilačkog rata u saranji sa Federalnim ministarstvom rada i socijalne politike.

#### **Član 20.**

Pravne osobe koje podnesu zahtjev za izmirenje neuplaćenih doprinosa za penzijsko i invalidsko osiguranje za razdoblja osiguranja iz člana 1. ovog Zakona, a nakon 31.12.2014. godine i dalje nisu plaćale doprinose, obavezne su u roku od 60 dana od dana stupanja na snagu ovog zakona pokrenuti stečajni postupak.

Odredba stava 1. ovog člana ne odnosi se na javna preduzeća niti ustanove.

#### **Član 21.**

Za određivanje kategorija osiguranika iz člana 3. ovog Zakona i razdoblja osiguranja mjerodavni su podaci matične evidencije o osiguranicima i obveznicima uplate doprinosa koju vodi Federalni zavod i podaci Porezne uprave Federacije BiH.

#### **Član 22.**

Ovaj Zakon stupa na snagu osmog dana od dana objave u „Službenim novinama Federacije Bosne i Hercegovine“.

